

四庫全書

集部

欽定四庫全書

宋詩紀事卷九十

錢塘厲鶚撰

鍾離權

宣和書譜神仙鍾離先生名權不知何時人間  
出接物自謂生于漢呂洞賓于先生執弟子禮  
自稱天下都散漢字畫飄然有凌雲氣

草書詩

露滴紅蘭玉滿畦閑拖象履到峰西但令心似蓮花潔

何必身將槁木齊古塹細香紅樹老半峰殘雪白猿啼  
雖然不是桃花洞春至桃花亦滿溪

夷堅志淳熙十一年溧陽倉斗子坐盜官米黥  
配而籍其家得草書二軸題云庚申歲書其名  
權花押止如一劍之狀蓋鍾離翁也其詞云云  
李粹伯跋之曰字畫放逸有翔龍舞鳳之勢脫  
去尋常畦徑非得于心而應于手者不能爾飄  
然神仙風度固有所本云真本藏于建康府治  
軍質庫絹素標飾處皆斷裂獨字畫不動景裴  
嘗見之庚申歲者豈非藝祖創業建隆元年乎

示太原學士

風燈泡沫兩相悲未可遺榮自保持領下藏珠當猛取

身中有道更求誰才高雅稱神仙骨智照靈如大寶龜

一半青山無買處與君攜手話希夷

元祐七年九月九日鍾離權書

雲麓漫抄莊綽跋云昔維揚有何仙姑者世以  
為謫仙能與真靈接一日鍾離過之使治黃素  
乃書此詩呂公亦跋其後令侯王學士至授之  
後數日王古敏仲自貳卿出守會稽至維揚訪  
姑即以與之王秘不以示人

## 呂 岫

岫字洞賓關右人唐德宗朝呂渭之孫咸通中

舉進士不第值黃巢亂攜家隱居終南山學老

予法年百餘歲而狀貌如嬰兒世傳有劍術時  
至陳搏室其事跡多顯于宋

書楚州紫極宮小軒

宮門閒一入獨凭闌干立終日不逢人朱頂鶴聲急

避暑

錄話

題岳州古寺二首

朝遊北海暮蒼梧袖有青蛇膽氣麤三醉岳陽人不識  
朗吟飛過洞庭湖

獨自行時獨自坐無限時人不識我惟有城南老樹精  
分明知道神仙過

蒙齊筆談洞賓呂渭之後五代間從鍾離權得  
道權漢人不老自本朝以來與權更出没人間  
權不甚多而洞賓蹤跡數見好道者每以為口  
實余記童子時見大父魏公自湖外罷官還道  
岳州客有言洞賓事者云近歲常過城南一古  
寺題二詩壁間而去說者云寺有一大古松呂  
始至時無能知者有老人自松顛徐下致恭故  
詩云然

### 書沈東老壁

西鄰已富憂不足東老雖貧樂有餘  
白酒釀來緣好客

黃金散盡為收書

避暑錄話東林沈氏世為著姓元豐間有名某  
字東老者家頗藏書喜賓客東林當錢唐往來  
之衝故士大夫與游客勝士聞其好事必過之  
沈亦應接不倦嘗有布裘青巾稱回山人風神  
超邁與之飲終日不醉薄暮取食餘石榴皮書  
一絕壁間即長揖出門越石橋而去追躡之已  
不見意其為呂洞賓也

畱詩太平寺

手內青蛇凌白日洞中仙果豔長春  
須知物外烟霞客  
不是尋常磨鏡人

青瑣高議賈師雄即中治平中通判邵武嘗收  
鐵鏡甚大非常物也久欲淬磨未得其人左右  
言近有回處士自言善磨鏡召至風骨軒昂非  
常人也飲酒畢推藥鏡上言藥少當自取之既  
去不回詢其宿在太平寺畱詩一絕而去取鏡  
視之藥已化去堆藥處一點表裏通明如寒玉  
春水

### 書與胡詠之

濟世應須不世才調羹重見用鹽梅種成白璧人何處  
熟了黃梁夢未回相府舊開延士閣武夷新築望仙臺  
青雞唱徹函關曉好卷游幃歸去來



題秦州天慶觀壁

石池清水是吾心漫被桃花倒影沈一到邽山空闕內

消閒塵累七弦琴

墨莊漫錄鄴陽胡詠之朝散生平好道元符初  
嘗于信州弋陽縣見一道人青巾葛衣神氣特  
異因揖而延之對飲道人指取大白滿引無算  
曰君有從軍之行去否胡疎然曰當去蓋是時  
欲就熙河帥姚雄之辟也道人曰西陲方用師  
好去索紙書詩云云授詠曰為我以此寄章相  
公且曰章相公好箇人又錯了路徑也問其姓  
名不甯言乃拂衣去明日因告縣令徧邑物色  
竟無見者詠至京師見王副車詠具告以此欲  
持詩謁子厚詠曰慎不可上方以邊事倚辦相

公丞相得此必堅請去上必疑怪詰其所以然  
君且得罪詠以為然徑趨幕從取青唐既還闕  
則子厚已去矣他日子厚北歸聞有此詩就詠  
求之其真本已為副車奄有乃錄寄之子厚見  
詩嘆曰使吾早得此詩去位久矣豈復有今日  
乎方詠之在邊日嘗至秦州天慶觀聞說呂先  
生在此月餘近日方去矣問何以知其為呂道  
士云道人去時適道衆皆赴鄰郡醮道人顧小  
童曰吾且去借筆書壁候師歸示之小童辭以  
觀新修戒勿令浣乃曰煩貯火殿爐吾欲禮三  
清而去既而行殿後砌下有池水甚清洌乃以  
爪畫殿壁畱詩云云後題回字衆驚歎以為必  
呂翁也壁甚高其字非手可能及却山即泰山  
也此說予聞江元一太初云

## 題冢上亭

冢上爲亭鬼莫嗔  
冢頭人即冢中人  
凭欄莫起存亡意  
除卻虛空總是塵

西溪叢語襄漢隱者躬耕數畝因古冢爲亭往來題詩甚富一日柱閒得一絕相傳呂翁作也

題崇元觀

在吉水縣

褰裳嬾步尋真宿  
清景一宵吟不足  
月在碧潭風在松  
何必洞天三十六

方輿勝覽

題京師景德寺東廊三學院壁

明月斜秋風冷  
今夜故人來不來  
教人立盡梧桐影

庚溪

詩話

題靈石屋山

南塢數回泉石西峯幾疊烟雲登攜孰以爲侶顏寓李

甲蕭耘

竹坡詩話西湖諸寺所存無幾唯南山靈石猶是舊屋寺僧言頃有數道人來丐食拒而不與乃題詩屋山而去至今猶在字畫頗類李北海好事者譯之乃是呂洞賓與三人者來耳李甲近世人東坡以比郭恕先善畫而有文餘不知為何人當是神仙也

呂仙牧童

絕句

草鋪橫野六七里，笛弄晚風三四聲。  
歸來飽飯黃昏後，不脫蓑衣臥月明。

西清詩話：鍾弱翁帥平涼，一方士通謁從牧童，牽黃犢立于庭下。弱翁異之，指牧童曰：道人頗能賦，此乎？笑曰：不煩。吾語是兒，能之。牧童乃操筆大書云：云既去郡，人見方士擔兩大甕，長歌出郭，迹之不見。兩甕乃兩口，豈洞賓耶？

許堅

許堅江左人，早歲以時事干江南李氏，不見禮。

拂衣歸隱茅山太平興國八年自茅山游廬山  
或在洪州西山吉州玉笥山

宿溧陽靈泉精舍僧以白字韻請畱詩

近枕吳溪與越峯前朝恩賜靈泉額竹林晴見雁塔高  
石室曾棲幾禪伯荒碑字沒秋苔深古池香汎荷花白  
客有經年別故林落日啼猿情脈脈

郡閣雅談

張虛白

虛白邢州人

遺崔母

武陵溪畔崔婆酒天上應無地下有南來道士飲一斗

醉臥白雲深洞口

湖廣總志虛白舉進士不第辟穀從劉易陳搏  
遊寓武陵崔母家崔飲以醇酒一旦歿崔殯之  
後邑人余安見虛白賣藥揚州市中賦詩託安  
遺崔崔得詩啟殯視之乃知屍解

石仲元

仲元字慶宗宋初桂林七星山道士以能詩名

楊徽之守湘源大加稱賞目爲玉方響有桂華

集

陽朔道中

平原翠削萬瓊瑰  
頓轡塵沙眼暫開  
文網牽人寧底急  
未妨得意看山來

句

石壓筍斜出岸懸花倒生

以上桂林府志

沈廷瑞

廷瑞筠州高安人玉筍山道士



別僧昭瑩

南北東西路人生會不無早曾依閭阜又卻上玄都雲  
片隨天闊泉聲落石孤何期早相遇樂共煮菖蒲

郡閣雅談沈廷瑞吏部郎中彬之子棄妻入道  
居玉笥山雍熙二年上元日辭道侶念人生幾  
何賦無病而終遺言于弟子以畫土宿一幘度  
人經一卷隨葬後二年有閭阜山僧昭瑩于山  
門相遇云暫到廬山尋知已畱土宿一幘及度  
人經一卷五言詩一首為別昭瑩到玉笥山話  
及方知沈道士已亡往墳上見土坼裂尺餘蓋  
屍解也

張無夢

無夢宇靈隱號鴻濛子與种放劉海蟾爲方外  
友事陳希夷多得微旨久之遊天台登赤城廬  
于瓊臺觀真宗召對除著作郎不受賜還山令  
台州給著作郎俸以養老有瓊臺集

天台桐栢觀

天台瀑布落青天觀在天台瀑布邊道士祇今燒藥處  
仙翁曾是種芝田龍居古洞遺殘雨鶴出高巢點破烟  
暫別靈谿遊五岳不知重到又何年

赤城志

劉遁

贈丁晉公

屢在仙遊亭上醉仙遊洞裏杳無人  
他時鳴鶴歸滄海  
同看蓬萊島上春

古今詩話丁晉公舊有園在保康門外園有仙遊亭仙遊洞與道士劉遁往來遁作詩贈公云云後南遷遁往見公于崖州方思其詩知為異人也

許昌齡

南莊

南莊相見北莊居更入深山十里餘幽谷每尋樵徑上  
真心還與世情疎雲中大吠流星過天外雞鳴曉日初  
昨日有人相問訊旋將落葉寫回書

皇朝類苑許昌齡安世諸父早得神仙術杖策  
居潁陽石唐山歐陽永叔生平不肖信佛老與  
語豁然有悟嘗手書其詩

申徒有涯

高吟

仲尼非不賢爲世所不容嗤嗤同舟子不識人中龍溪

雪載落梅寒聲激長松往來但一嘯一壺隱塵蹤

樹萱錄申徒有涯方外之士嘗攜一白甕瓶自陽羨遊吳中大風雪中脫衣賃舟沽酒斗餘飲畢大吐同載者惡之榜舟者逐之有涯挈瓶登岸倚欄高吟云云歌訖跳身入瓶悄然無迹

劉元英

元英號海蟾子

題潭州壽寧觀

醉走白雲來倒提銅尾秉引箇碧眼奴擔著獨壺瘦自言秦世事家住葛洪井不讀黃庭經豈燒龍虎鼎獨立

都市中不受俗人請欲攜霹靂琴去上芙蓉頂吳牛買  
十角溪田耕半頃種秫釀白醪總是仙家境醉眠松陰  
下閒過白雲嶺要去即便去直入秋霞影

湖廣總志劉元英號海蟾子初名操燕地廣陵  
人以明經擢第仕燕主劉守光為相一旦忽有  
道人來謁自稱正陽子索雞卵十枚金錢十枚  
以一文置几上累十卵于錢若浮圖之狀海蟾  
驚歎曰危哉道人曰人居榮樂之場履憂患之  
地其危有甚于此者復盡以其錢擘為二擲之  
而去海蟾由此大悟遂易服從道宋仁宗天聖  
九年遊歷名山所至多有遺跡一日于潭州壽  
寧觀題古詩十韻云云仍自寫真其傍撮襟書  
龜鵝齊壽四字題云廣陵間民劉某書丹成尸

解至元六年贈海蟾明悟宏道真君

羅道成

道成郴州人

游嶽

因思靈秀偶來遊  
碧玉寒堆萬疊秋  
直上太山高處望  
根盤連接十餘州

白驪代步若奔雲  
閒人所至畱詩迹  
欲知名姓問源流  
請看郴陽山下石

古今詩話慶歷中有間人遊嶽謁主簿郭及甫  
視其刺羅道成也自言郴州人問郴人言有真  
人得道乘白驪行石壁上迹至今存

### 黃希旦

希旦字姬仲邵武人自號支離子生于仁宗景  
祐間入道本軍九龍觀熙寧中詔住京師五福  
宮又典太乙宮事年四十二解化有竹堂集

### 謝人惠星冠

學道多年尚屈蟠豈勝仙伯贈我冠曉簪乍覺星攢頂



夜戴偏宜月滿壇對鑑寧忘朋友正避時羞爲利名彈  
預思他日雲林下輕罩紗巾鶴髮寒

和賈鴻舉移竹

琳房珠館何虛寂寶砌無塵苔蘚碧仙翁倚檻靜吟哦  
卻憶篋簪拂巖石勁節虛心守歲寒未嘗暫變風霜色  
移來迢遞不辭遠深根訝向瑤臺植漸承春意葉青青  
時惹天香烟幕幕月籠翠影尚蕭疎露被繁枝纔滴瀝  
迎風閒夜擬龍吟結實他年期鳳食非才終約老烟霞

此際謬當親采擇寄言紅紫莫相猜彼此無情蒙化力  
逢時翦拂任他人沈去葛陂都咫尺

以上竹堂集

歸真子

呈桂州唐秀才

袁州相見又之全不遇先生道未圓大抵有心求富貴  
到頭無分學神仙篋中靈藥宜頻施鼎裏丹砂莫妄傳  
待得角龍爲宴會好來黃陂臥林泉

古今詩話唐子正著作桂州人治平中赴舉至  
全州途中雇一僕負重擔健若飛羽雖鞭馬疾

馳常去馬百步外恐其逸去遂遣之其僕即日自全州二千七百里日午已到唐州畱書驛吏曰候桂州唐秀才至即投之唐月餘到驛驛吏出書題云呈桂州唐秀才歸真子封唯一詩云云話其狀貌乃全州僕也畱書之日乃全州所遣日也始悟其為神仙唐後為邕倅熙寧丙辰交趾寇邕唐遇害乃詩所謂角龍也

## 陳景元

景元字太虛自稱碧虛子建昌南城縣人神宗朝為右街副道錄賜號真人

宣和書譜景元每著書什襲藏之有佳客至必發函具鉛槧出客前以求點定乞歸廬山詔賜

白金既歸行李無他物百擔皆經史也所居以道儒醫書各為齋館而區別之四方學者從其遊則隨所類齊館相與校讐人人得盡其學而所藏號為完書未嘗與俗子將迎惟相善法雲寺釋法秀人比之廬山陸脩靜交惠遠也所役二奴一曰黃精一曰枸杞一時大臣如王安石王珪喜與之遊嘗與蔡卞論書至歐陽詢曰世皆知其體方而莫知其筆圓卞頗服膺

### 臨化作

昔之委和今之蛻質非化非生復吾真宅

宣和書譜

### 李陶真

陶真不知何許人熙豐間游武夷好吹笛諸道

士招飲于雲房陶真皆赴而諸房笛聲一時同  
發後寓修于建平之通仙巖一日畱詩別衆不  
知所往

絕句

毛竹森森自翦裁試吹一曲下瑤臺當塗不遇知音聽  
袖拂白雲歸去來

崇安縣志

周貫

貫膠東人熙寧元年至豫章石頭寺屍解

冷齋夜話周貫者不知何許人自號木雁子治  
平熙寧間往來西山日酣飲畜一大瓢夜以為  
溺器工作詩詩成癖嘗宿奉新龍泉觀半夜槌  
門道士驚問其故曰偶得句耳因使口誦貫以  
手指畫吟曰彈琴傷指甲蓋席損髭鬚是夜寒  
甚貫以席自覆故耳

### 荅人

八十西山作酒仙麻鞋輒斷布衣穿相逢甲子君休問

太極光陰不計年

冷齋夜話

題虛白觀

在筠州上高縣

出郭十餘里藍輿試初程山高雲氣重野曠烟光輕斷

石絡樹根敲崖溜泉聲行行款道宇一徑掌樣平仙隱  
記甘羅觀名取莊生寶藏絢金碧仙佩飛瑤瓊簷鐸自  
相語龕燈弄微明出門境界寬一筵大江橫蹁躚白羽  
衣孤鶴松梢鳴

瑞州府志

郭行

行字思誠不知何許人舉進士不第遂學道不  
食唯飲酒馬默知鄆之項城縣行訪之一見如  
舊云與祕丞同隱華山來時默官祕丞也後行

死期年有人過華陰見行附書并詩與默發其墓唯杖屨而已

寄馬默祕丞

汶上懽然喜再逢爲言相憶白蓮峯死生決定歸真性  
歲月休交改舊容漫把文章添野錄奈何官爵自天鍾  
南山記得登臨處閑卻烟雲千萬重

陶朱新錄

邢仙老

詩贈晚學李君



日轉蓬窻影漸移羅浮舊隱到多時瀛洲伴侶無消息  
風撼巖前紫桂枝

玉照新志熙寧辛亥聞李侯事忘其名以供奉  
官為汾州管界巡檢一日捕盜入九疑山深歷  
巖洞遙見嶺中有青烟一點了然可辨村民云  
居常見闕樵牧皆不能到李識其處歸以告同  
姓李彥高李君業文志未就嘗以養生不死為  
意聞之即尋烟處攀緣而上有草堂三間一老  
人燕坐其中李問老人姓名言唐末人避世來  
此姓邢名字不必問指面前二小池乃有竹筒  
作刻漏狀曰從來甲子日辰吾盡知之所不知  
者國姓年號耳李因告以熙寧天子姓名傳序  
年月仙老領之而已數日復往因授李以內丹  
真訣臨別書一絕題云詩贈晚學李君

高坦

畱別句容簿

巖下相逢不忍還  
狂歌醉酒且盤桓  
仇香莫問神仙事  
天上人間總一般

西溪叢語熙寧間句容簿至茅山遇道人高坦  
被髮跣足與簿劇談飲酒終日書一詩畱別而  
去

李斯立

斯立居舒州靈仙觀常從蘇軾游年踰八十始

卒

句

巖溜連雲凍溪梅帶雪香

安慶府志

黃知微

知微字明道江州人元豐間居廬山太平宮號

養正先生

句

溪雲拂地送殘雨谷鳥向人啼落花

九江府志

王文卿

文卿麻姑山道士

麻姑壇

漉酒巾籠五岳冠  
嬾攜琴鶴上朝端  
丹房晝睡烟霞煖  
紫府夜歸星斗寒  
詩就幾教山鬼泣  
劍靈那許俗人看  
麻姑報道桑田變  
一曲仙棊尚未殘

丹霞洞天志

劉跛子

與客飲市橋

遷客南湘召赴京輪蹠迎送一何榮爭如與子市橋飲  
且免人閒寵辱驚

冷齋夜話劉跛子者青州人也往一拐每歲必一至洛中看花館范家園春盡即還京師為人談噱有味范家子弟多狎戲之張丞相召自荆湖時跛子與客飲市橋客聞車騎過甚盛起觀之跛子手挽其衣使起飲作詩云云予姻家許中復之內乃趙槩參政之孫女云我十許歲時見劉跛子來覓酒飲笑語而去計其壽百四五十許嘗館于京師新門張婆店三十年日坐相國寺東廊人無識之者

李伯祥

伯祥眉山矮道士見百斛明珠

句

夜過脩竹院醉打老僧門

能改齋漫錄蘇黃門云東坡先生稱眉山矮道士好為詩格不能高往往有奇句可喜也

三朶花

絕句

戴花三朶鎮長春誰識元中不二門  
醉裏自傳神似活終當不老看乾坤

夷堅志房州異人或云姓李氏常戴紙花三朶入市能作詩皆神仙異談自能寫真東坡常作詩詠之郡人稱三朶花先生猶記其一絕

徐守信

守信海陵人少孤役于天慶觀嘉祐四年天台道士余元吉來遊示惡疾守信事之無倦忽于溺器得丹砂餌之自是常放言笑歌日誦度人經絕粒至數日爲人言禍福如影響發運使蔣之奇以經中有神公受命普掃不祥之語呼曰

神公自是以神翁目之徽宗召入言事多驗  
賜號虛靜沖和先生年七十有六卒賜大中  
夫給葬用四品禮厝城東響林原弟子苗希頤  
褒次其事爲語錄

陸游家世舊聞元符中哲宗嘗遣密問聖嗣神  
翁曰吉人君子吉人者上名也于是召至都下  
上用太宗見陳搏故事御絳褐即便殿以賓禮  
接之泰州志云神翁役天慶時常持一帚供掃  
除後響林方洲仙源霜節亭諸處多生帚竹宛  
然叢筍

## 絕句



汲汲光陰似水流  
隨時得過便須休  
兒孫自有兒孫計

莫與兒孫作馬牛

徐神公語錄

獻康王詩

牡蠣灘頭一艇橫  
夕陽西去待潮生  
與君不負登臨約

同上金鼇背上行

輟耕錄章安張善初云初宋高宗在潛邸日泰州徐神翁能知前來事羣聞言于徽宗召至以賓禮接之一日獻詩云云及兩宮北狩匹馬南渡建炎庚戌正月三日帝航海次臨海縣之章安鎮灘淺閣舟落帆于鎮之福濟寺前以候潮顧問左右曰此何山曰金鼇山入問此何所曰

牡蠣灘因默思神翁之詩乃徒步登岸見此詩  
在寺壁間題墨若新方信其為異人也

### 陳應祥

應祥字知明西安人政和中試修文輔教科授  
道至元素大夫凝神殿校籍有詩集

### 西興晚望

晚色催吟思江風掠斷霞  
亂鳥投岸木幽鷺集汀沙  
月出海門近人歸渡口斜  
會須操舴艋隨處是天涯

衡州府志

### 劉卞功

卞功字子民濱州安定人築環堵于家之後園  
不語不出者三十年徽宗聞其名召之不起賜  
號高尚先生靖康之變不知所終

賔退錄子民六歲誤觸甕碎家人更譙之神色  
自若曰俟釘校者來當全之復譙其妄曰人破  
尚可修矧甕耶語未絕釘校者至相與料理頃  
之如新嘗云常人以嗜欲殺身以貨財殺子孫  
以政事殺民以學術殺天下後世吾無是四者  
豈不快哉

荅外兄王子常問修行之術

王名衣官侍郎

非道亦非律又非虛空禪獨守一畝宅惟耕已心田

賔退

錄

張景端

景端字子仁嗣漢二十九代天師大觀初贈葆  
真先生

題梅山

作尉南昌日投書北闕頻忠言不悟主直節恥爲臣漢  
室多災異吳門念隱淪掛冠忘寵辱蒙袂出埃塵虹屈  
英雄氣鷗羣自在身永懷三洞訣高謝九江春擇地開

仙館看雲翦壽巾元臺秋步月虛室夜凝真無夢生芳  
草畱年養大椿碧茸香不斷青鳥性偏馴太液刀圭就  
中黃道路新武夷空墜馬郁木竟棲神絳節雖朝帝靈  
波尚濟民一名傳舊史千古事嚴禋瑞氣生仙藥清風  
付羽人壇遺金鼎像井鎖玉華津地接洪厓府溪通劔  
水濱鶴歸雲抖擻龍起石鱗皴已悟身爲患元期德有  
鄰青山不忘我今日是天親

梅仙事貴

張繼先

繼先字嘉聞嗣漢三十代天師崇寧中賜號虛靖先生

天師世家云崇寧四年召繼先建醮內廷因密奏赤馬紅羊之兆請修德靖康丙午之變其言始驗還山題脩然亭壁曰赤帝御龍行末伏姮娥分月入深山人莫能測

遊洞霄

洞霄深處日棲真  
仙子親曾此致身  
鳳闕有人來獻禮

溪聲山色愈增新

洞霄詩集

曹道沖

道沖南岳羽流

題謝先生白雲菴

桃源洞口武陵人  
跳出紅塵二十春  
但喜白雲深有趣  
不知青眼近來親  
丹砂已向坤爐伏  
玉汞先從坎鼎烹  
活計一張焦尾外  
碧壇三尺禮星辰

南岳總勝集

王介

介七閩羽客

洞霄宮

飄飄遼鶴去難尋野客重來歎復吟  
許邁林中丹竈冷  
郭文山上白雲深  
南陵事跡都非昔  
北嶺歸期直到今  
珍重玉京無限意  
待將功節養高岑

洞霄詩集

皇甫介

介無爲軍道士

洞霄宮

大滌雲深日月遲  
羽人曾作帝王師  
鼎中絳雪成千日  
巖下幽花占四時  
玉杖已乘鸞鶴去  
青山難使鬼神移



人間萬事惟閑好山頂誅茅待幾時

洞霄詩集

黎師侯

師侯字道華臨川人入道學詩于謝無逸與曾

季狸裘父文慧大師惠巖同時以詩鳴號臨川

三逸有頤菴集

門外

門外黃塵尺許深癡兒抵死競浮沈誰知一寸茅簷日

天付閑人值萬金

詩家鼎鑪

明水寺

寒日荒荒野外昏  
亂山深處訪祇園  
一條澗水穿龍洞  
十里松陰蔽寺門  
衲子茹蔬憐鶴瘦  
吾儕飲酒作鯨吞  
夜闌笑語喧空閣  
驚起棲鴉過別村

西江詩話

游道士

道士饒州人

書假簿

相別來來一百秋  
幻泡重作故人游  
紫泥白雪尋常事

何苦人間話不休

今是堂手錄太學禮遠齋饒州一同人遇游道士道士本里人化去已多年一日來客位相訪約同人請假歸齋假簿中有詩一絕乃道士所書也

葛道人

句

百轉已休鶯哺子三眠初罷柳飛花

竹坡詩話宣和中錢塘有葛道人以業屨為生一日為寺僧修屨口中作吟哦聲僧訝而問之曰今日偶得句耳

木廣漠

廣漠和州道士

自咏

百萬人中隱一身深如勺水在滄溟獨醒自負賢人酒  
天闊難尋處士星照影自憐湖水碧高吟贏得蜀山青  
城南老樹如相問不枉翻空過洞庭

費衮梁溪漫志雍孝聞蜀人崇寧間廷試對策  
力詆時政闕失駁放後雖授以右列然卒不仕  
浪迹山林遂遇異人得道政和末變姓名為道  
士入內說法徽宗謂其得林靈素之半因賜姓

木更名廣漢竟不知其為孝聞也

過東坡墓

文星落處天地泣此老已亡吾道窮才力謾趨生仲達  
功名猶忌死姚崇人間便覺無清氣海外何人識古風  
平日萬篇誰愛惜六丁收拾在瑤宮

玉照新志秋浦朱去奢謂雍孝聞自海外量移  
池州以卒嘗有詩云官田種秫陶元亮私釜生  
塵范史雲至今郡人猶傳誦之孝聞沒後和州  
道士亡其姓名冒而為孝聞走江淮間其才亦  
不下孝聞有弔項羽廟文云無守陵之總帳有  
照夜之寒缸過東坡墓題詩云云宣和初至京

師遂得幸祐陵謂其人可及林靈素之半錫姓名木廣漠至紹興中猶寓會稽之天長觀明清尚及識之

### 羅浮黃野人

### 歌詩

雲來萬嶺動雲去天一色長嘯兩三聲空山秋月白

西清詩話黃野人葛仙弟子或云葛仙之隸稚川棲山煉丹野人隨之葛既仙去畱丹柱石間野人自外至得一粒服之為地行仙近有人遊羅浮宿畱巖谷間中夜見一人身無衣而紺毛覆體意必仙也乃再拜問道其人了不顧但長嘯數聲響振林木歌詩云云

裴道人

歌

好酒喫三盞好花插一枝思量今古事安樂是便宜

泉州府志紹興中有人自稱江東裴道人頭帶通草花行歌于市一日于北山石嵌中端坐而逝

盛曠

曠字元放武林人紹興中入道赤松觀高宗召見賜號至樂先生

獨吟

刊名紫簡羣魔賓扶桑暘谷奏玉晨控鶴三素輔翊宸

敢忘南岳魏夫人

金華山志

陳田夫

田夫字耕叟居南岳九真洞老圃菴緝南岳總

勝集隆興改元自序

題朱陵洞白雲堂

我愛瀟湘境朱陵後洞天白雲堂裏客青草渡頭眠小



艇牽紅鯉幽池種白蓮  
頤真堪此地風月兩依然

南岳總勝

集

金梁之

梁之字彥隆休寧人兩浙提刑受長子以蔭爲  
奉新尉一旦若狂惑者不滿秩棄歸自是袒跣  
垢汙走歛之墟落動旬月不食夜臥往往有光  
樞密朱樸一見則曰是八百仙之一也直以金  
丹動盪故耳晚年多食大黃棲止無常處自稱

野仙每云我當以八月死幸毋焚我淳熙元年  
八月十二日夜半起坐揮扇而逝年六十有一  
葬城陽山立壇其上後有自蜀見之者爲攜家  
問歸蓋尸解云

洪杏庭金野仙傳同郡士人朱南一字德修滿  
灑閑逸至老不娶野仙贈詩有云寄語月溪朱  
逸士他年同賞水仙花野仙歿二紀南一下世  
士友率葬正在野仙墓後山中水仙正開其前  
知類如此

# 荅郡守趙師夔

王侯門戶嬾開顏  
斗酒千錢一笑閒  
無雪可欺青檜老  
有天難管白雲閑  
丹霄作客曾騎鶴  
紫府爲家不買山  
京口相逢又相別  
隻琴孤劍幾時還

郡侯雪天開宴即席以填字韻索詩

昨夜嫦娥弄玉纖  
也應掐月作花鈿  
爲嫌梅影太清瘦  
幾片飛來疎處填

以上新安志

贈郡士張夢錫赴南宮試

秋針刺水麥鋒齊  
漠漠平沙白鷺飛  
盡道春光已歸去

清香猶有野薔薇

新安志夢錫下第歸授徒他邑望窗外綠秧如  
針白鷺飛過徘徊驚訝而籬間紫薇正開悉如  
詩中所云

黃居萬

瀑布

龍梭織處人難見地軸舒來尺莫量定是水仙王性好  
逐時裁去補滄浪

娛書堂詩話道士黃居萬瀑布一絕亦有形容  
之工

楊介如

介如字固卿豐城人開禧間遊邊塞畫策不售  
遂隱黃冠後入閤阜山有隱居集

句

酒量春吞海詩肩夜聳山

西江詩話介如嘗主清江柏堂觀一日諸文士  
集觀中唱酬介如蓬鬢垢衣坐其側句至朗吟  
云云座皆驚服

章至謙

至謙號清隱道士

九日和子美韻

九日登高眼界寬  
羽衣雲集盡清歡  
黃花滿泛淵明酒  
白髮仍簪子夏冠  
庭下流泉趨澗急  
座間清氣逼人寒  
不須更問明年健  
但向眉頭鬢角看

洞霄詩集

陳良孫

良孫道號寢虛先生  
童年學道隱跡吳山事見  
趙汝湜九鎖步虛詞引

雪中浴冷泉示諸友

風鼓空林雪蔽山身如鐵石不知寒  
塵埃豈是相隨物

付與溪流出世間

洞霄詩集

許翁翁

偶作

我疑麋鹿是前身九十餘年作隱淪  
飄瓦御風離碧落  
虛舟隨水到紅塵  
無恩可報空磨劒  
有道欲傳難得人  
回首孤山無限好  
不如歸去任天真

雲麓漫鈔毫人許翁翁少隸軍籍以功補官遇  
異人棄家入襄漢山中學道乾道中來臨安爲  
史丞相治脾痛一鍼而愈常有詩云云

### 王思明

思明餘杭洞霄宮道士自號竹菴曾求陸放翁

### 爲本宮碑

### 聞蟬

變化南風裏超然濁得清一枝藏去穩兩翼蛻來輕呼  
吸飽珠露吟哦散玉笙秋林如罷唱無處問虧成

洞霄詩集



吳洞明

洞明餘杭洞霄宮道士自號芝坡

和章清隱山居

物外無寒暑從教歲月深  
虛閑渾屬我寵辱不驚心  
貧樂知書味詩豪借酒吟  
山居何所有萬籟奏清音

洞霄詩集

龔文煥

文煥餘杭洞霄宮道士自號菊巖

山中

白日幽情愜閑門到者稀嗜茶和月煮採藥帶雲歸春  
樹餘花落天壇獨鶴飛年華自來往慵換薜蘿衣

洞霄詩集

貝守一

守一餘杭洞霄宮道士自號月溪

冬晴晚步

浮雲初斂夕陽斜路入江村四望賒木厭霜濃頻脫葉  
梅嫌春小未開花翩翩過雁摩晴漢隱隱孤帆趁落霞  
欲壯吟懷沽斗酒野田多處少人家

洞霄詩集

朱真靜

真靜餘杭洞霄宮道士自號雪崖

石室菴夜坐

青熒寒焰弄微明  
燈與幽人一樣清  
案上黃庭渾懶看

時聞敗葉打窗聲

洞霄詩集

龔大明

大明餘杭洞霄宮道士號山隱

南湖

梅霖初歇水平湖湖上青山展畫圖更著樓臺相掩映  
風流端不減西湖

洞霄詩集

徐仲淵

仲淵大滌山凝神齋高士

清隱齋飲酒

暖風薄雨輕烟散晴日游絲柳絮亂竹窗午夢啼鳥驚  
松軒晚飲幽人喚一壺碧酒如春濃萬斛羈愁若冰泮  
興來索筆漫題詩碧桃花下綸巾岸

洞霄詩集

舒道紀

題浩然觀

澄心坐清境虛白生林端  
夜靜笑聲出月明松影寒  
絳霞封藥竈碧竇濺齋壇  
海樹幾回老先生  
棊未殘

詩林萬選

趙元清

元清號石泉金華赤松觀道士有松花集

題江湖偉觀

鳳舞龍飛王氣蟠兩都  
賦在一闌干  
伍員不死江潮壯

西子如生越水寒，春日百花連上苑。  
秋風落葉滿長安，錢唐占盡東南美。  
河洛何人著眼看，金華詩粹

陳孟陽

孟陽閭阜山道士

荅清江錢大尹問閭阜山中景

形如閭阜對清江，吳漢神仙古道場。  
玉像靈多民受賜，天書歲久墨猶香。  
絳霞密鎖靈仙館，碧霧輕籠正一堂。  
蒼蘚爛斑雙鯉石，寒泉澄湛九龍塘。  
著衣臺上三冬暖，

鳴水亭前六月涼  
擣藥鳥聲喧  
夜榻昇天馬  
跡印西岡  
葛憩源深生異草  
凌雲峯峻染瑤光  
丹井雖存人杳漠  
松巢空見鶴飛翔  
屏粧水墨誇陶弼  
門斷塵埃憶孟昌  
風來松檜笙簫地  
春入園林錦繡鄉  
箇中自少紅塵到  
閑裏惟知白晝長  
景物敢吟成  
實錄願憑賢宰一稱揚

閩阜山志

葛長庚

長庚字白叟又號白玉蟾  
閩清人家瓊州入道

武夷山嘉定中詔徵赴闕館太乙宮封紫清明  
道真人有海瓊集

採蓮舟

葭蒲滿蕩起晴煙總屬霜鷗雪鷺天一片紫菱分十字  
中間放過採蓮船

登樓秋望

凭徧朱闌醉已蘇樓前眼纈望中疏漢陽草樹看來短  
淮岸漁家淡欲無薄暮鴉翻千點墨晴空雁草數行書



多情庾亮吟魂遠風泛蘆花秋滿湖

中秋月

日路按西湖遊覽志作得月樓

千崖爽氣已平分萬里青天輾玉輪起向錢唐江上望  
相逢都是廣寒人

題桐栢觀

仙翁夜來扣林壑約我明朝過南岳石壇對坐話松風  
鶴唳一聲山月落

午飯羅漢寺

林間一徑似驚蛇中有禪關隱紫霞  
烟鎖蒼松遮寺額  
風搖翠竹撼簷牙  
客來寂莫盤香穗  
飯罷從容淪茗花  
到此徘徊歸去晚  
夕陽挂樹一聲鴉

初至桐州

夜半江風吹竹屋  
起挑寒燈憐影獨  
荒雞亂啼思轉多  
黠鼠嘯躍眠不熟  
舊曲聲情覺淒涼  
故園心眼時斷續  
何當牽犬臂蒼鷹  
錦帽貂裘呼蹴踘

以上海瓊集

黃春伯

春伯號天谷

訪白玉蟾值其出題壁

三言

怪訪怪怪不在茅君山來相待

絕句

半篙春水一蓑烟抱月懷中枕斗眠說與時人休笑我

英雄回首即神仙

以上劉後村詩話

夏元鼎

元鼎字宗禹永嘉人號雲峯散人又號西城真

人

絕句

崆峒訪道至湘湖  
萬卷詩書看轉愚  
踏破鐵鞋無覓處  
得來全不費功夫

蓬萊鼓吹  
附錄元鼎博極羣書屢試不第應賈  
許二帥幕出入兵間至上饒夜感異夢弃官入  
道至南岳祝融峯遇赤城周真人求其指示乃  
大悟因題詩云云  
所著有陰符經講義三卷圖  
說一卷  
崔公藥鏡箋一卷  
今永嘉有夏仙里云

楊至質

至質字休文號勿齋閭阜山道士淳祐中敕賜  
高士右街鑒儀主管教門公事著有竹宮表制  
太乙宮代言之文也

茅山

玉肺浮空已字山五門不鎖洞天寬紫花可餌秋尋朮  
紅燄難埋夜見丹畫出一牛方水草飛來三鵠各峯巒  
仙蹤寂寞高風遠誰爲先生指額癥

茅山志

李德真

客崇安寄蕭小山太博

宦清只有著書忙六館歸時客滿堂  
芍藥待吟班已峻梅花曾賦筆猶香  
夜瞻北斗星河近晴倚東樓嶺樹長  
別日未深情不淺雪風吹老孟襄陽

武林春遊即事

風光如此莫傷春雲樹烟花一色新  
杜宇不啼真解事

帝鄉誰是月歸人

以上詩林萬選

王克功

克功字德成號漫翁

詠柳

春到枝枝是綠絲  
秋來葉葉是愁眉  
灞橋何限經行者  
不記尋花繫馬時

全芳備祖

劍浦思歸

韶華客裏一番老  
自歎此生行路多  
獨上危樓望鄉國

闌干倚徧柰愁何

詩家鼎鑪

思友

孤坐忽太息拂衣臨長風天高夕月冷木脫秋山空良  
晤匪易得好懷難再同思君不可見心逐孤飛鴻

梅僊山

芒屨支藤上翠微長松影裏扣柴扉石壇卅竈蒼苔冷  
天闊風高鶴不歸

以上詩林萬選

董嗣杲

嗣杲字明德號靜傳宋季入道孤山四聖觀改  
名思學字無益有西湖百詠



雨中宿洞霄

青青九鎖山步步聽潺湲雨重精神倦雲深意緒閑禽  
聲依石樹泉溜出巖闌落落仙蹤在何能見大還

洞霄詩集

西湖百詠

存十九首

環碧園

在豐樂樓北柳洲之側恭聖仁烈楊太后宅園

繞舍晴波聚釣仙五龍池畔柳洲前清虛不類侯家屋  
輪奐曾資母后錢三面軒窗秋水觀四時簫鼓夕陽船  
攬將山北山南翠獨有黃昏得景全

東西馬塍

在潘水橋北羊角埂是也河界東西土脈宜栽花卉園人工于種接仰此為業

間有園亭不過養種而塍有土神庙額扁作馬城

土塍聚落界西東業在澆畦奪化工接死作生滋夜雨

變紅爲白借東風幾家衣食花姿異兩岸園池地勢同

病叟扶鋤勸晚照前身莫是橐駝翁

水仙廟

在水月園西廟創梁大同年間號錢唐龍君廟錢氏繼請額穹碑尚存乾道中重建

寶慶間郡守別建蘇堤上乃謂舊廟有視湖邈焉牽連遷就之說梁大同時今幾傳矣

雲翹雨佩有遺仙香火寧隨世代遷廟始大同年紀著

額頌乾化敕碑鐫鳳閑露輦荒瑤草龍溼秋衣翦玉蓮  
隄上初新誰述記卻無門外一泓泉

孤山

在西湖中孤山路西建炎前多有民屋間以四菴院山背皆花園及冢隧山之東為林和

靖隱廬就葬其下紹興中建延祥觀奉四聖香火獨畱和靖一墓民屋菴院悉徙山北觀東為園累朝臨幸寶祐二年分地之半建西太乙宮陳朝柏在和靖墓南

縹緲蓬萊擁翠寒百年營取屋十間黃庭殿矗烟霞老  
瀛嶼堂幽日月閑水泛花陰藏輦路牆分柳色護仙關  
林家梅冢陳家柏萬古流芳鎮此山

西林橋

在孤山西即古之西村喚渡處

水竹雲山拱畫圖因懷喚渡想東都  
雨餘晴竦銜西照風過春船入裏湖  
闌曲祇供遊子凭林間今有野人無  
隔牆莫是神仙宅紅白梅花五百株

岳鄂王墓

在棲霞嶺口葬名將太師忠武鄂王岳飛于此

將軍魂夢遶旂幟偃月謀成尚忍言  
一旦風波誰左袒八陵荊棘自中原  
更無雁帶邊頭信惟有天知地下冤  
鬱鬱棲霞霞外樹墓門不掩雀巢喧

玉泉

在淨空寺內齊建元中靈悟大師曇超卓菴演法于錢唐靈苑山龍君遠來聽法又為撫

掌出泉砌以方池畜大金魚有景定開周棟記

南齊事蹟已消沈曾立苔碑記古今一老出泉猶撫掌  
此僧演法欲傳心樹頭龍過家家雨池面魚游尾尾金  
行客不須閒照影要知澤物溥春霖

西溪

在靈隱寺山背居人能力其勞漁樵耕牧各遂其業楊蟠詩云為愛西溪好長憂溪水窮

山源春更落散入野田中

漁樵耕牧自成村就屋編籬古意存出塢野雲多曲折

過橋溪水半清渾一逢白壁書香社幾見朱闌障墓門  
地利最饒人事簡山家還有別乾坤

九里松

在一字門裏舊名袁公松門唐開元間刺史袁仁敬夾道種松錢唐吳說書九里松三字揭之紹興中思陵幸天竺回易以奎扁終不稱聖意旨令金填說書重揭之至今尚存

開元刺史擅清風九里新栽夾道松屋頂自生濤浪勢  
根頭誰覓茯苓蹤行春橋掩雲千態一字門封翠幾重  
人訝金填吳說筆不知此筆遇高宗

冷泉亭

在飛來峯下唐右司元稹建刺史白居易撰記按古誌靈隱澗古許由嘗飲于此盧

全父詩云問山何以名靈隱山曰當年隱許由

小朵峯前玉鏡寒幾回倚杖聽潺湲箕公飲澗非凡水  
慧理呼猿是此山亭角靜依金刹古樹身涼臥石闌閑  
無因可洗人間熱時御清風照影還

香林

在下天竺後塔西日月出左舊名香林洞又名香桂林今直扁香林

日月巖頭古翠埋綿雲深隔洞門開蒼藤隨石無根活  
靈杞何年有種栽氣凝野烟疑麝過暖薰山雨誤蜂來  
空亭誰領幽芬坐雪鶴同行損綠苔

鍊丹井

在下竺西廊下葛仙翁有丹在井水可以療病

稚川曾此倒靈瓢  
闌上銀牀壓甃腰  
丹氣騰空知幾轉  
神光射屋起中宵  
有茶可品春煎細  
何疾能治曉汲遙  
萬古仙蹤應不泯  
輶轡聲落病僧寮

真珠泉

在龍山寨崇政院內開運中建顯德五年院東泉湧擊聲則泉出如貫珠景祐中元

絳名之州家取為酒名雷峯路口張府園有泉亦同名

泉光四散駭猿猱  
迸起平池點滴高  
誰欲斗量徒積夢  
人將瓶汲甃辭勞  
聲隨夜雨穿疎箔  
名逐春風入小槽



別有雷峯峯下園一泓墮沒在蓬蒿

甘園

在淨慈寺相對齋宮之西舊為甘內侍園淳祐中名湖曲園咸淳中屬謝府名新園園倚

雷峯有四面堂淳祐郡守所勅堂下接翠芳園船坊

內官園邃傍齋宮楊柳隄南翠幾重四面堂虛凌上界  
五層塔近壓中峯徑連湖水行幽草廊接風亭臥偃松

鄰岸御舟空望幸深坊長日鎖飛龍

勝景園

在雷峯路口東開禧間韓侂冑園陸放翁作南園記韓遊村莊曰惜無犬吠隨有效

易今名  
之者韓敗園屬官名慶樂園淳祐中撥賜嗣榮王

名花嫋嫋草纖纖  
臺榭隨幽逐勝添  
十樣結亭環水樹  
一碑述記臥風簷  
梅關橋落停櫬鑰  
射圍樓空失堞簾  
向日相傳誰學吠  
村莊畢竟出沽帘

長橋

在勝景園東在昔此橋跨水甚長橋亭且壯麗日填月塞皆民居矣橋西有寺南對鳳皇

山又有澄水閘東抵清波門湖橋此最短而長名自若

南港虛明架石梁  
寺樓鐘落幾斜陽  
相傳亭跨危基壯  
誰想橋橫古道長  
澄水閘荒沙草碧  
清波門近市塵黃  
鳳皇山在闌干外  
玉抹烟屏鷺一行

慈雲嶺

在方家峪西南嶺下為郊臺嶺頂可望江湖石上刻後唐篆字云梁單開之歲興建

龍山至渚灘之歲開慈雲嶺至今尚存

疊疊流雲步步苔  
九霄紫氣限蓬萊  
後唐刻石初開路  
南宋郊天別築臺  
慰眼江湖空歲月  
傷心陵寢墮塵埃  
桃花爭趁春風老  
又引遊人一度來

包家山

在慈雲嶺南冷水峪多桃花名桃花關關門上揭蒸霞二字拜郊臺此山之西籍田

園在山之南

綺霞蒸日透林梢  
一族南山尚姓包  
冷水峪邊苔色老

冲雲樓下樹陰高園鄰古道傳耕籍臺倚青城想拜郊  
欲趁桃花尋隱去關門無鑰不須敲

聚景園

在清波門外阜陵致養北宮拓園西湖之東斥浮屠之廬九曾經四朝臨幸繼以諫

官陳言出郊之令遂絕園今荒圯惟柳浪橋花光亭存

鑿鈴遺響輦遺蹤萬景曾經聚此中寺宇有名基址散  
君王無逸讌遊空橋昏柳浪龍舟雨亭冷花光雉扇風  
臺沼已無春又老萬年枝上夕陽紅

以上西湖百詠

聶碧窗

碧窗江西人京口天慶觀主嘗爲龍翔宮書記  
敕詔至有感

乾坤殺氣正沈沈又聽燕臺降德音萬口盡傳新詔好  
累朝誰念舊恩深分茅列土將軍志問舍求田父老心  
麗正立班猶昨日小臣無語淚霑襟

哀被畧婦

當年結髮在深閨豈料人生有別離到底不知因色誤  
馬前猶自買胭脂

詠北婦

雙柳垂鬟別樣梳  
醉來馬上倩人扶  
江南有眼何曾見

爭卷珠簾看固姑

以上輟耕錄

褚伯秀

伯秀號雪巖錢唐人  
宋末天慶觀道士  
以清苦

節行聞

送玉海宗師還山

湖海天教十載閑  
玉經功就勝居壇  
驚塵天目妨龍臥

晚歲華陽望鶴還入詠五噫丹闕近會心三笑畫溪寒

世緣歷盡仙緣熟坐斷陪真向上關

茅山志

善恭道人

以下無名道流

絕句

爛柯真訣妙通神一局曾經幾度春自出洞來無敵手

得饒人處且饒人

西溪叢語蔡州襄信縣有恭師閔秀才說嘗有道人善恭凡對局率饒人一先後死于襄信託後事于一村叟數年後叟為改葬但空棺衣衾而已

無名道人

絕句

偶到皇都玩月華  
笙歌畱我醉流霞  
勸君不用悲塵土

天上人間只一家

睽車志宣和間元夕州西酒樓一道人來索酒  
痛飲初不持錢將去題詩壁間云云乃探懷取  
藥拭杯成黃金以償酒直明日喧傳都下禁中  
聞之以金十兩易其杯去

無名道人

絕句



瑤峯一別杳難期消渴從教醉枕敲不信丹青能畫得  
五更燈暗月來時

侯鯖錄云一道人敗道後作

吳山道人

畱藥籃中詩

一騎如龍送客歸銀髮綠耳步相隨佳人未許輕分別  
不是仙翁豈得知

閒窗括異志三山曾陟書館陳氏七載音信不通  
有道人自吳山來謂之曰子思鄉之切何不

少歸陟曰水陸三千幾時得到道人翦紙為馬  
令合眼上馬以水喫之其疾如風祝曰汝歸毋  
久畱須臾到家門戶如舊妻令入浴易新衣陟  
曰我便去妻曰纔歸便去何不念父母妻子乎  
陟便上馬而行所騎馬足折驚寤身在書館中  
隨身衣皆新製者道人亦不見惟畱一藥籃中  
有詩云云

羅浮山中客

題壁

雲意不知滄海春光欲上翠微人閒一墮千劫猶愛梅

花未歸

谷音咸淳中客有戴烏方巾著襪往來羅浮山中見人則大笑反走三年不言姓名它日醉歸忽取煤書壁云云

無名髯仙

絕句

鳴梢疊葉響颼颼  
枕底寒聲爲客留  
野鶴不來山月墮  
獨眠滋味五更秋

困學齋雜錄前宋士人山行于絕壁人跡不到處見有題詩者云云少前遇髯人坐大石上意其為詩者欲前揖忽不見余謂仙人亦未能忘情者邪

洛浦道士

道士鳳陽人修真于鼎州蘇溪靈巖山化去

絕句

一水穿崖走碧沙  
崖前樛木偃龍蛇  
分明便是桃源洞  
不見溪中流落花

湖廣總志



宋詩紀事卷九十